

新竹市東區東園國民小學 112 學年度校內語文競賽客家語朗讀文章(海陸腔)

編號 1

【另外一種煩勞】劉玉蕉原作

千盼萬望，阿姆答應咧！

牽等新个自行車，佢胸挺挺、鼻鼾鼾仔¹想愛一路飄轉去，阿爸知佢佇毋著，細聲咄²佢講：「毋識騎過，毋驚死斯做你去騎。」佢鼻空摸啊摸，睇下脣頭老妹該臺矮佗佗个四輪自行車，「哼！」佢風神哎哎，看等面前金皙皙仔³緊摻佢搵手个自行車，想講：「座大，乜毋係無半點好空啦！」毋過，風神過後，對自家像嘮風樣抽高个身體，佢還係試著盡闕，闕到會死！

「阿婆，若孫仔身高超過標準，愛打全票咧！」阿婆好帶佢出門遶寮、看電影，這恁久，輒輒堵著共樣个问题，阿婆敗勢，佢乜感覺已無面子，斯加幾公分定斯愛加一倍个錢，實在無道理。

「手腳輕兜，毋好一日到暗挨著神打著佛！」阿婆唸佢、阿姆哆佢。實在冤枉，屋下斯恁大仔定，佢既經當忍耐毋敢搞球仔咧，還係不時毋係拔著⁴東西，斯係踢著凳腳，毋係挑挑，嗶分人誤會講賤手賤腳，唉，頭那還痛！總講啊，佢手長腳長，坐等人嫌碇位⁵；企等人嫌杈眼斯著咧啦！

¹ 鼻鼾鼾仔：音 pi⁺ ngiu^ˇ ngiu^ˇ er；脾氣倔強又不聽話的樣子。

² 咄：音 dod；喝斥。

³ 金皙皙仔：音 gim^ˋ siag siag er；亮晶晶。

「生著恁高恁大咧，毋加減搵手兜咩！」看，阿姆个箭又射過來哩啲！拜託，屋脣鄰舍、阿公、阿婆哪個無安腦佢乖、肯搵手，比起老妹，該斯天爭地哦！尤其係大拚掃時節，阿爸个事頭，佢貌有三股一恁多，恁樣个佢，在屋下還係分人嫌到無一坵好，正經無天理。

手長腳長在屋下有恁樣个待遇，在學校有較好無？無，人講：「天塌下來有高个人撐等。」無毋著，先生講臺一企，目珠看啊去，堵堵到後排，變把戲都毋得！運動會時節，大家認為你个腳較長，跳高、跳遠定著打有名，麼人知悽慘到愛先生來安慰，走追仔總看得哪，還見笑，聽過自家會徑自家無？該斯係佢啦！在運動坪踉到⁶狗食屎，搵到大家人哈哈笑，最尾校長賞佢運動精神獎，這補償對佢來講已實在，承蒙佢！

雖然高溜大漢帶分佢一時个毋慣摻煩勞，毋過，佢相信毋慣過後，佢會體會著成長个快樂。煩勞个正面係安腦佢知人我，先生个目珠督等，佢毋敢狡怪，成績嘎日日進步。

⁴ 拔著：音 bad^ˋ do^ˊ；突然被某種物體接觸到。

⁵ 碇位：音 din^ˇ vui⁺；佔據空間。

⁶ 踉到：音 doi^ˋ do^ˇ；跌到。

編號 2

【學騎車】鄒瑞梅原作

在僮讀小學一年生个時節，阿爸輒常用自行車載僮去學校讀書。上崎該時，阿爸大汗潑小汗箭到氣掉氣急¹，下崎个時節，就一路溜等下。路兩片析種歸排竹仔，還有一頭黃梔花，風吹過來，黃梔花个清香，到今還記到清清楚楚。

僮當愛坐在後座，聽阿爸講天說地，阿爸長下教僮做人个道理，佢講：「大人毋講古，細人仔毋知寶。」兩子爺一路唱歌唸曲，山歌溜天，還有《三字經》摻《弟子規》也係坐在貨棚頂讀會个。

到僮讀三年生个時節，想愛騎自行車，就拜託阿爸教僮騎。阿爸摻自行車牽到大禾埕，過擎一枝擔竿綯在後斗頂高，佢講恁樣車仔橫下來个時節，就毋會分車仔砑著。阿爸捍等後斗分僮坐好勢，再過教僮兩隻腳踏在腳踏仔頂高，出力箭，車仔就行咧。僮个心肝像「十五隻吊桶打水——七上八落」當緊張呢！阿爸在脣頭摻僮做膽，阿爸講：「『知得孔竅，打得鬼噉。』較細義兜，毋使驚，阿爸在後背摻你搵手。」

僮當煞猛練習，全無歇睏，大禾埕緊來緊鬧熱，阿哥、阿姊、老弟、老妹還有隔壁个阿明、阿秀通棚走過來摻僮加油，連阿明畜个狗也跔等僮个車仔後背換來換去。恁多人在該看僮騎車仔，做毋得漏氣²哦！跔倒就盡無面子，阿明一定會去學校放送，想愛分同學笑僮。

為著無愛分阿明摻同學笑，僮當煞猛練習。哈哈哈哈哈，無一點鐘久僮就曉騎咧。阿爸摻僮講：「還慶哦！毋聲就毋聲，一聲就打爛盞。」阿爸話正講出嘴，手一放，車仔就橫下來咧，正經還見笑哦！賺痛个，手巴掌、膝頭都鑪溜皮咧，還痛哦！痛到目汁濫汨。

大家都無笑僮，還走兼來關心僮有仰般無？阿明問僮還愛練無？加講个，「趕燒！趕熱！」哪有毋練个道理？阿爸看僮有增志，過一擺捍等後斗，分僮騎上自行車，僮盡命牯踏，練到汗流脈落，這擺正經曉騎咧！僮歡喜靈天摻阿爸講，等僮大咧，一定愛用這臺腳踏車載阿爸滿哪去寮，遠遠看著阿爸摻大家企在禾埕脣，笑到嘴擘擘。

¹ 氣掉氣急：音 hiˋ chaˋ hiˋ gɪb；呼吸急促的樣子。

² 漏氣：音 lauˋ kuiˋ；閩南語借詞，意指出糞、出洋相。